

VIJESTI



Đukanović gost Bošnjačkog instituta

Gost na prvom ovogodišnjem Forumu Bošnjačkog instituta bit će premijer Republike Crne Gore Milo Đukanović, koji će govoriti o temi "Evroatlantska perspektiva regiona - iskustva Crne Gore". Đukanović će 23. februara prisustvovati forumu na poziv Bošnjačkog instituta. U saopćenju koje je upućeno Feni Bošnjački institut podsjetio je da je Crna Gora dobila članstvo u Akcionom planu, prvom koraku ka punopravnom članstvu u NATO-u, kao i u EU, što joj daje za pravo da svoja iskustva iz prethodnog perioda podijeli ili prenese na zemlje iz okruženja. Forum će voditi Zlatko Lagumdžija.

Nacionalne podjele i "podobni"

U Vitezu iz Travnik, koji je u stopostotnom vlasništvu i upravljanju Vlade FBiH, i radnici i sindikati su drastično podijeljeni prema nacionalnoj pripadnosti, na bošnjački i hrvatski dio. To je samo jedna od kvalifikacija koje su se čule u dijalogu koji je održan u Travniku u okviru aktivnosti Forumu sindikalnih aktivista SDP-a BiH "Pravda radnicima sada". Rečeno je da se i u ovom slučaju Vlada pokazala kao vrlo loš poslodavac jer radnicima ne obezbjeđuje ni najosnovnija prava. U preduzeću Impregnacija iz Viteza, čiji je vlasnik Austrijanac, koji se netragom izgubio, radnici su ostavljeni na milost i nemilost, bez plata, zdravstvenog osiguranja i potpuno nezvjesne budućnosti.



Izaslanstvo HDZ-a BiH u Livnu

Izaslanstvo HDZ-a BiH predvođeno predsjednikom Draganom Čovićem razgovaralo je jučer u Livnu sa članovima Predsjedništva Županijskog odbora HDZ-a. Na sastanku je bilo riječi o aktualnoj gospodarsko-političkoj situaciji u BiH, Federaciji i Livanjskom kantonu, s posebnim osvrtom na položaj hrvatskog naroda, predstojećim aktivnostima stranke i planu obilježavanja 20. obljetnice HDZ-a BiH u 2010. godini.

Čović je informirao prisutne o aktualnoj političkoj situaciji, strategiji HDZ-a BiH za predstojeće opće izbore 2010. koja će biti usvojena na narednoj sjednici Predsjedništva stranke 25. februara u Busovači. Dopredsjednica HDZ-a BiH i predsjednica FBiH Borjana Krišto upoznala je prisutne o funkcioniranju vlasti u Federaciji.

Civilno društvo, bezvizni režim i izbori Šta su dva mjeseca naspram 15 godina

Parlamentarci EU su od članova civilnog sektora čuli tezu da bezvizni režim ne treba ukidati pred izbore kako se ne bi koristio u kampanji. Reakcije se ne stišavaju, mišljenja su podijeljena

OIABiH, kao jedna od vodećih organizacija u BiH na polju mladih, svih ovih devet godina postojanja bila je jedan od glavnih aktera za povećanje mobilnosti mladih i lobista za ukidanje viznog režima za građane BiH.

Na internom sastanku sa predstavnicima Evropskog parlamenta u Sarajevu, izvršni direktor OIA Jan Zlatan Kulenović, između ostalog, kaže se u saopštenju koje je stiglo na adresu redakcija, istakao je kako bi "bilo kontraproduktivno da se ukidanje viznog režima od EU dogodi samo mjesec-dva pred izbore, jer će to biti nagrada i odličan adut za promociju političkih stranaka koje čine vlast u ovoj zemlji".

Armenija i Azerbejdžan

- Upravo su trenutne vlasti glavni i jedini krivci zašto BiH nije ispunila ni deset posto uslova u procesu približavanja evropskim integracijama i zašto nije ispunila sve uslove za viznu liberalizaciju još prošle godine kao Srbija, Crna Gora i Makedonija. Uostalom, najbolji indikator koliko su se zalagali za mobilnost mladih jeste i činjenica da je Ministarstvo civilnih poslova BiH odbilo prošlo ljeto jedan milion eura pomoći iz IPA fonda za ulazak BiH u EU program "Mladi u akciji", koji omo-



Kulenović: Vlasti su jedini krivci gućava međunarodne projekte mladih, a crvenili su se i na Evropskoj ministarskoj konferenciji o reformi visokog obrazovanja kada je BiH stavljena u red posljednjih zemalja po reformi, u rangu Armenije i Azerbejdžana, gdje je upravo mobilnost studenata jedna od najvažnijih stavki. Zato ne treba dozvoliti nesposobnim političarima da manipuliraju javnost, kupe jeftine poene na račun ionako izolirane, getoizirane i isključene populacije BiH, koja, ako je mogla izdržati 15 godina, može i dodatna dva mjeseca bez vizne liberalizacije u korist poruke da političari trebaju i moraju biti odgovorni, u praksi trebaju čitav mandat raditi za



Vračić: Tehnika, ne politika

dobrobit građana i moraju više investirati u mlade ove zemlje, kaže se u saopštenju OIA.

S druge strane, Think tank Populari izričito se ograđuje od stavova, jer predočeni argument da će u tom slučaju oni koji su loše vladali biti nagrađeni materijalom za predizbornu kampanju - "zapravo i nije argument".

- Iznenađeni smo ovakvom nepromišljenom reakcijom jer odaslan poruka može kreirati značajnu prepreku BiH na putu ka EU. Ona nudi skoro neoboriv argument protivnicima vizne liberalizacije za BiH: "Zašto da ukinemo vize za BiH, kad i njihovo civilno društvo kaže da to nisu zaslužili."

Kada je, konačno, 2008. uručena Mapa puta za viznu liberalizaciju, EU je bila jasna: ovo je tehnički, a ne politički proces - ispunite uslove (njih 174) i bićete nagrađeni ukidanjem viznog režima.

U junu 2009. BiH je na popravnom ispitu. Ovaj put vlasti u BiH uložile su napore, te sada ispunjavamo veliki broj uslove iz Mape puta. BiH nikada nije bila bliža uspjehu koji su svi građani BiH željno očekivali.

Nedopustivo je da pojedinci koji tvrde da zastupaju civilno društvo u BiH istovremeno šalju poruke: "Ako su građani BiH izdržati 15 godina sa vizama, mogu i dodatna dva mjeseca bez vizne liberalizacije."

Šteta po građane

Osnovni cilj rada civilnog sektora morala bi biti dobrobit svih građana BiH koji, između ostalog, uključuje i povećanje mobilnosti ljudi. Ovakav stav ne samo da ne doprinosi ispunjenju tog cilja nego nanosi mnogo više štete, jer je stavljen u kontekst zastupanja mišljenja cijelog bh. društva. Populari se ovim putem želi ograditi od pripadanja tom i takvom "civilnom društvu", kaže se u saopštenju Popularia koje potpisuje izvršna direktorica Alida Vračić.

F. B.

Rifat Dolić i Gradimir Gojer u sukobu interesa?

10 novih prijava

Sankcionirani vijećnici Jasmin Didović (Bosanski Petrovac) i Amer Žiga (Pale - Prača)

Zbog kršenja Zakona o sukobu interesa u organima vlasti FBiH, Centralna izborna komisija BiH je na jučerašnjoj sjednici donijela odluku o sankcioniranju vijećnika u OV-u Bosanski Petrovac Jasmina Didovića.

Duple funkcije

Izrečena mu je kazna nepodobnosti kandidovanja za bilo koju funkciju izabranog dužnosnika, nosioca izvršne vlasti ili savjetnika u periodu od četiri godine zbog istovremenog obavljanja funkcije vijećnika i ovlaštene osobe (direktora) preduzeća Didović d.o.o. Bosanski Petrovac, koje je sklapalo ugovore veće od 5.000 KM na godišnjem nivou sa organima koji se finansiraju iz budžeta na bilo

kojem nivou. Zbog prekršaja je i novčano kažnjen sa 5.000 KM.

Istom kaznom zabrane kandidovanja sankcioniran je i vijećnik u OV-u Pale - Prača Amer Žiga, zato što mu je bliski srodnik (majka) istovremeno obavljao poziciju člana UO Javnog stambenog, komunalnog, građevinskog i uslužnog preduzeća Prača d.o.o.

Zbog istovremenog obavljanja funkcije vijećnika u OV-u Bugojno i pozicije predsjednika Predsjedništva (ovlaštene osobe) Udruženja ratnih vojnih invalida Bugojno, koje se finansiralo iz budžeta u iznosu većem od 10.000 KM, sankcioniran je Ramiz Sejfić i to novčano sa 1.000 KM.

CIKBiH je donio odluku o pokretanju postupka za ut-

vrđivanje sukoba interesa poslaniku u Predstavničkom domu Parlamenta BiH Rifatu Doliću zbog članstva u NO i Skupštini preduzeća Saniteks Velika Kladuša. Postupak za utvrđivanje sukoba interesa pokrenut je i protiv poslanika u Skupštini TK-a Kazafera Bečića, te poslanika u Skupštini ZDK-a Harisa Sejdića, za kojeg se sumnja da mu bliski srodnik (otac) obavlja poziciju Skupštine preduzeća Koteks d.o.o. Tešanj.

Vijećnici ovlaštene osobe

Donesena je i odluka o pokretanju postupka za utvrđivanje sukoba interesa vijećnika u OV-u Stari Grad Sarajevo i Gradskom vijeću Grada Sarajeva Gradimiru Gojeru, jer je i

predsjednik (ovlaštene osobe) Društva pisaca BiH, za koje se sumnja kako se iz budžeta finansiralo u iznosu većem od 50.000 KM. Utvrđivanje sukoba interesa pokrenuto je i protiv vijećnika u Gradskom vijeću Mostara Mirsada Huseinagića jer se sumnja da osim te obavlja i poziciju zamjenika direktora (ovlaštene osobe) JP Vodovod Mostar.

Sukob interesa utvrđivat će se za vijećnika u OV-u Ključ Fikreta Kozica, vijećnika u OV-u Velika Kladuša Envera Melkića, vijećnika u OV-u Stolac Zorana Turkovića i vijećnika u OV-u Bugojno Miroslava Zelića, te za direktora Centra za socijalni rad Stolac Ivana Perića.

A. TERZIĆ